

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR. S. SUBRAMANIAM  
MENTERI KESIHATAN MALAYSIA**

**PERTANYAAN : LISAN**  
**DARIPADA : YB PUAN HAJAH ZURAIDA BINTI**  
**KAMARUDDIN [AMPANG]**  
**TARIKH : 24 MAC 2014**  
**SOALAN :**

**YB Puan Hajah Zuraida Binti Kamaruddin [Ampang]** minta **MENTERI KESIHATAN** menyatakan secara terperinci tentang kajian Skim 1Care setakat ini dan bilakah Kementerian akan melaksanakan skim tersebut.

**Tuan Yang di-Pertua,**

Untuk makluman, berkaitan 1Care, cadangan ini masih lagi di peringkat konsep. Sehingga kini, masih belum ada sebarang keputusan muktamad yang dibuat mengenai model sistem kesihatan baru yang akan diguna-pakai untuk Negara ini termasuk model pembiayaan kesihatan. Pelbagai aspek persediaan mengenai 1Care sedang diperincikan dengan mengambilkira cadangan dan input dari pelbagai pihak yang berkepentingan (*stakeholders*). Usaha ini merupakan satu proses yang dinamik dan interaktif. Hasil perbincangan perlu diteliti rapi dan jika perlu, perubahan akan dibuat dari semasa ke semasa.

Namun demikian, KKM sentiasa berusaha untuk mentransformasikan sistem kesihatan Negara supaya ia turut maju seiring dengan hasrat Kerajaan untuk menjadikan Malaysia sebuah Negara berpendapatan tinggi. Beberapa langkah pro-aktif ke arah meningkatkan penyampaian perkhidmatan kesihatan kepada rakyat sedang diusahakan untuk dilaksanakan dalam jangka masa terdekat:

- a. Memberi keutamaan hala tuju KKM bagi tahun 2014 ke arah pencegahan penyakit dan mengekalkan tahap kesihatan untuk menjadikan rakyat yang lebih sihat dengan memberi fokus kepada pengukuhan penjagaan kesihatan primer;
- b. Disebabkan isu kesesakan di fasiliti kesihatan Kerajaan, terdapat keperluan untuk melihat semula proses kerja di semua fasiliti tersebut dengan mengoptimumkan sumber tenaga kerja yang ada untuk penyampaian sistem kesihatan yang lebih baik dan memupuk perkongsian awam-swasta;
- c. Membangunkan Pelan Induk Sumber Manusia Kesihatan dengan mengenalpasti keperluan latihan, pendidikan dan bekalan bagi mengatasi masalah penempatan dan keperluan sumber manusia untuk kesihatan;
- d. Menyediakan Pelan Induk Infrastruktur bagi mengatasi masalah kesesakan di hospital;
- e. Memperkasakan individu dan komuniti ke arah penjagaan kesihatan yang lebih baik;

- f. Memperkukuhkan penjagaan domisiliari; dan
- g. Memperkukuhkan keselamatan dan kualiti makanan & persekitaran sihat.

Di samping itu, KKM juga sedang mengkaji semula caj bayaran rawatan warga asing di hospital Kerajaan, di mana mereka akan dikenakan bayaran mengikut kadar kos sebenar seperti mana yang diputuskan semasa Mesyuarat Majlis Ekonomi. Langkah tersebut dijangka akan dapat menjimatkan perbelanjaan perubatan Negara sehingga RM100 juta setahun.

Adalah diharapkan menerusi kesemua langkah tersebut sistem kesihatan di Negara ini akan lebih berdaya saing serta dapat memenuhi keperluan rakyat di Negara ini.

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN SEAH LEONG PENG [ TELOK INTAN ]**

**TARIKH : 24 MAC 2014**

**RUJUKAN : 6543**

**SOALAN:**

**Tuan Seah Leong Peng [ Telok Intan ]** minta **MENTERI DALAM NEGERI** menyatakan sehingga kini bagaimana keberkesanan PDRM dalam menangani kes jenayah berat hasil daripada pewujudan semula undang-undang pencegahan, penubuhan pasukan *Task Force* dan juga kawalan ketat yang dilakukan di sempadan Malaysia - Thailand.

## **JAWAPAN:**

Tuan Yang di-Pertua,

Kerajaan memberikan fokus yang khusus untuk mengurangkan kadar jenayah di bawah "*National Key Result Area*" (NKRA) di bawah inisiatif Mengurangkan Kadar Jenayah. Di samping itu, sebagai tambahan kepada inisiatif tersebut, pihak polis telah menubuhkan pasukan khas untuk menangani masalah jenayah berat dan aktiviti penyeludupan dadah iaitu *Special Task Force On Organised Crime* (STAFOC) dan *Special Tactical Intelligence Narcotics Group* (STING) dengan kekuatan seramai 400 orang pegawai dan anggota yang berpengalaman di Bukit Aman. Penubuhan jabatan baru iaitu Jabatan Pencegahan dan Pembenterasan Jenayah (JPPJ) juga sebagai usaha pihak polis untuk mencegah jenayah secara lebih holistik dengan mengembeling keseluruhan jentera dalam pasukan polis dan meningkatkan lagi penglibatan masyarakat setempat untuk bersama membantu pihak polis dalam membanteras jenayah.

Dengan langkah-langkah yang dilaksanakan telah menunjukkan kesan yang positif terutama jenayah berat dan jenayah terancang di seluruh negara dapat dibendung dan dikawal.

Statistik perbandingan dalam tempoh kajian untuk jenayah berat bagi tahun 2013 dan 2014 seperti berikut:-

**STATISTIK PERBANDINGAN KES JAN - FEB 2014  
BERBANDING JAN - FEB 2013**

<b>KES</b>	<b>JAN - FEB 2014</b>	<b>JAN - FEB 2013</b>	<b>+/-</b>	<b>PERATUS (%)</b>
<b>BUNUH</b>	<b>82</b>	<b>88</b>	<b>-6</b>	<b>-6.8</b>
<b>CUBA BUNUH</b>	<b>8</b>	<b>5</b>	<b>3</b>	<b>60</b>
<b>SAMUN BERSENJATA API</b>	<b>12</b>	<b>27</b>	<b>-15</b>	<b>-55.5</b>
<b>JUMLAH</b>	<b>102</b>	<b>120</b>	<b>-18</b>	<b>-15</b>

Perbandingan untuk setengah tahun pertama dan kedua bagi tahun 2013 juga telah menunjukkan kesan yang positif, yang mana jenayah berat telah menunjukkan penurunan bagi tempoh berkenaan seperti berikut:-

**PERBANDINGAN KES JENAYAH BERAT BAGI  
JAN - JUN 2013 DAN JULAI - DISEMBER 2013**

<b>KES</b>	<b>JAN - JUN 2013</b>	<b>JULAI - DIS 2013</b>	<b>+/-</b>	<b>PERATUS (%)</b>
<b>BUNUH</b>	<b>319</b>	<b>308</b>	<b>-11</b>	<b>-3.4</b>
<b>CUBA BUNUH</b>	<b>30</b>	<b>23</b>	<b>-7</b>	<b>-23.3</b>
<b>SAMUN BERSENJATA API</b>	<b>88</b>	<b>82</b>	<b>-6</b>	<b>-6.8</b>
<b>JUMLAH</b>	<b>437</b>	<b>413</b>	<b>-24</b>	<b>-5.5</b>

Pihak polis mempercayai dengan langkah-langkah yang diambil serta pindaan kepada Akta Pencegahan Jenayah 1959 (Pindaan dan Permeluasan) yang telah diluluskan oleh Parlimen dan juga dengan penubuhan Jabatan baru iaitu Jabatan Pencegahan dan Pembenterasan Jenayah (JPPJ), masalah jenayah dalam negara untuk masa yang mendatang dapat ditangani dengan lebih holistik dengan mengembeling keseluruhan jentera dalam pasukan polis dan meningkatkan lagi penglibatan masyarakat setempat untuk bersama membantu pihak polis dalam membenteras jenayah di samping menimbulkan rasa *fear to be caught* kepada penjenayah.